

- 50 Prebet, et in speculo previa facta patent.
 Hunc sequitur, redoletque virum chorus incola Melros,
 Nec male degenerat a duce secta ducis.
 Sub trutina pensat, sub fine modi moderatur
 Singula, sub certo canone cuncta ligat.
- 55 Hic modus est auriga boni, rerum moderator,
 Hic moritur motus ad scelus omne movens.
 Hic risus sine tristitia, plausus sine planctu,
 Gaudia sunt sine ve, ver sine fine virens.
 Rarus ibi sermo, tenuis sopor, aspera vestis,
- 60 Vulgaris potus insipidusque cibus.
 Non manus hic errat, lux lascivit, gula sevit,
 Fluctuat auditus, naris odora petit.
 Est auris nec delitians, naris nec odorans,
 Gustus agrestis, lux ceca, modesta manus.
- 65 Non hic aspectus bombicina vestis adurit,
 Non in veste locum fucus adulter habet.
 Non varius cibus hic mensae fastidia tollit:
 Dat solitus pastus caseus, ortus olus:
 Non mensas reficit vis discretiva saporum,
- 70 Res ibi nulla sapit absque sapore dei.
 Non carnem caro suspirat, sed nescia carnis
 Carnem dediscit plus caro carne potens.
 Non mores maculat, renes quatit, afficit artus,
 Dissolvit corpus, imperiosa Venus.
- 75 In vultu testis color est et litera cordis,
 Mentis enim facies esse propheta solet.
 Adde loci nomen, locus est hic nomine Melros,
 Quod quasi venturi lingua propheta dedit.
 Ros hic ros sacer est fecundaque gratia celi,
- 80 Mel typus est operis atque figura boni.
 Sit potius Rosmel, quod Melros dicitur, ut sit
 Sillaba posterior anteriore prior.
 Dum ros hic nos irrorat, procedit in esse
 Germen, et in fructus germinis usus abit.

De Hugone Kancellario.

Excitare somno, Musa!
 stilo pridem minus usa,
 mente licet nunc optusa,
 perstrepe simphoniam.
 Toto nisu jocundare,
 mente laudes modulare:
 vox erumpens sonet clare,
 geminans leticiam.

2 Plectra movet tibi quidem,
 qua nunc canis cura pridem:
 tibi rursus instat idem,
 novam dans materiam.
 Causa laudis digna jure,
 causa toti regno curae,
 causa rei profuturae,
 dum solatur patriam.